

Na osnovu člana 16. stav 2. Zakona o Vladi Zeničko-dobojskog kantona-Prečišćeni tekst („Službene novine Zeničko-dobojskog kantona“, broj: 7/10) i člana 9. tačka i) Zakona o nadležnostima kantonalnih organa Zeničko-dobojskog kantona u oblasti zaštite i spašavanja ljudi i materijalnih dobara od prirodnih i drugih nesreća („Službene novine Zeničko-dobojskog kantona“, broj: 9/08 i 6/11), Vlada Zeničko-dobojskog kantona, na 26. vanrednoj sjednici, održanoj 15.05.2014. godine, donosi

## **ODLUKU**

### **o proglašenju stanja prirodne i druge nesreće**

#### **I.**

Proglašava se stanje prirodne i druge nesreće na području Zeničko-dobojskog kantona usljed prirodne nesreće - poplave.

#### **II.**

Radi zaštite i spašavanja ljudi i materijalnih dobara na ugroženom području Zeničko-dobojskog kantona određuje se:

-da se sva kantonalna ministarstva, druga tijela kantonalne uprave, upravne organizacije, pravni subjekti i druge institucije stave na raspolaganje Kantonalnom štabu civilne zaštite i Kantonalnoj upravi civilne zaštite, te da nadležni općinski štabovi civilne zaštite, također stave na raspolaganje sve resurse, koji će se prema planovima zaštite i spašavanja ljudi i materijalnih dobara koristiti na ugroženim područjima.

-prema Kantonalnom planu, u svim kantonalnim ministarstvima, tijelima kantonalne uprave, upravnim organizacijama i zavodima odmah uvesti neprekidno dežurstvo, radi izvršenja naredbi Kantonalnog štaba civilne zaštite,

-u skladu sa Kantonalnim planom i zahtjevima sa ugroženih područja, zadužuje se Kantonalni štab civilne zaštite da izvrši aktiviranje odgovarajućih službi zaštite i spašavanja i specijaliziranih jedinica civilne zaštite, a po potrebi drugih pravnih subjekata, javnih preduzeća i građana radi pružanja pomoći na ugroženom području,

-u slučaju potrebe, a na traženje nadležnih štabova civilne zaštite sa ugroženog područja, Kantonalni štab civilne zaštite će, u skladu sa svojim ovlaštenjima, angažirati i druge snage zaštite i spašavanja sa područja općina koje nisu ugrožene ovom nesrećom.

#### **III.**

Troškovi koji nastanu, angažiranjem Kantonalnog štaba civilne zaštite i Kantonalne uprave civilne zaštite, te dodatnim planskim angažiranjem nedostajućih resursa za spašavanje, tokom provođenja akcija zaštite i spašavanja pokrit će se iz Budžeta Zeničko-dobojskog kantona, planiranih za zaštitu i spašavanje u akontativnom iznosu do 200.000,00 KM za hitne mjere zaštite i spašavanja.

#### **IV.**

Zadužuje se Kantonalni štab civilne zaštite da u skladu sa Kantonalnim planom i važećim zakonskim propisima preuzme sve aktivnosti oko koordinacije i rukovođenja akcijama zaštite i spašavanja na ugroženom području.

#### **V.**

Obavezuju se svi rukovodioci organa kantonalnih uprava i upravnih organizacija Zeničko-dobojskog kantona, odnosno rukovodioci općinskih službi za upravu i rukovodioci pravnih lica i drugih institucija, da osiguraju provođenje naredbi štabova civilne zaštite u

pružanju pomoći i podrške u logističkim i komunalnim potrebama, evakuaciji, zbrinjavanju ugroženog stanovništva i materijalnih dobara, snabdijevanju stanovništva živežnim namirnicama, higijenskim potrebštinama, te medicinskom zbrinjavanju povrijeđenih i oboljelih stanovnika.

#### VI.

Zadužuju se nadležni organi u općinama da u skladu sa Uredbom o jedinstvenoj metodologiji za procjenu šteta od prirodnih i drugih nesreća („Službene novine FBiH“, broj: 75/04, 38/06, 52/09 i 56/09), aktiviraju svoje komisije za procjenu šteta, radi izvršavanja svojih zadataka u skladu sa navedenom uredbom.

#### VII.

Odluka stupa na snagu danom donošenja i ista će se objaviti u sredstvima javnog informisanja i u „Službenim novinama Zeničko-dobojskog kantona“.

Broj: 02-

Datum, 15.05.2014. godine

Z e n i c a

PREMIJER

*Munib Husejnagić, dipl.ing.maš., s.r.*

#### Dostavljeno:

1x Vladi Federacije Bosne i Hercegovine

1x Federalnom štabu civilne zaštite

1x svim općinama na području Zeničko-dobojskog kantona,

1x svima ministarstvima i drugim tijelima kantonalne uprave,  
organi, ustanove i organizacije

1x Službene novine Zeničko-dobojskog kantona,

1x a/a.